



莆陽知稼翁集下卷

宋尚書考功員外郎黃公度著

知邵州軍事借紫男沃編

新泉州惠安縣主簿孫處權校勘

明廣東按察司僉事十一世孫廷宣

工部右侍郎十一世孫廷用重校

詩

將赴高要官守書懷

古來仕路多機穽我復情田少町畦回首壯圖猶拾  
瀋驚心往事屢吹壑不因昏嫁那能許此去聲名敢

厭低但使安閒更强健何妨流落在塗泥

題瘦牛嶺

自笑年來爲食謀扶攜百指過南州時平四野皆青  
草此地何曾解瘦牛

中秋西江上六言

月色今宵萬里笛聲何處孤舟世事堪驚流水鄉心  
不忍登樓

賀劉史君仿

于門爲國產英賢淮海鍾靈五百年松竹千尋森氣

節江湖萬頃渺情田白頭未握封侯印皂蓋猶分刺  
史天俗變農桑皆犢佩家傳愷悌只蒲鞭斂容不動  
吏曹畏清坐無言上意宣四野歡聲豐歲裏西山爽  
氣壽杯前籬邊陶菊千苞折階下堯蓂一葉鮮香火  
祝公三入後却來平地作飛僊

南來苦熱戲作二首

農夫烈日夏畦耕僊家九轉丹竈成阿奴投燭婢翻  
羨飛蛾赴焰雞遭烹湯爲池兮火爲城未如三伏南  
州行

大旱赤地金將流火炎崑岡玉石休六月王師萬貔  
貅叢坐氊帳襲重裘鄰人延燒已焦頭未如三伏行  
南州

方帥務德滋生朝三首

一陽來復潛回葭琯之春和氣致祥果協桑弧之  
瑞事闕廊廟喜動乾坤共惟某官天上麒麟人  
間鸞鷲千齡際會氣鍾嶽瀆之靈萬口謳謠筭  
祝椿松之永某奉令承教之日淺受知被遇之  
恩深爰屆誕辰阻稱壽筭美武公之德如圭璧

願賡淇澳之詩俾魯侯之壽若岡陵敢効闕宮  
之頌繁蕪上瀆戰越交心

一氣潛回萬物春星躔降昴嶽生申釣臺今古風流  
在梅嶺東西雨露均再擁朱轡專節制久虛清禁待  
經綸衮衣莫訝公歸晚要使遐荒識鳳麟

一別帝城今幾秋憂時不復爲身謀粉榆故國三千  
里桃李新陰四十州談笑折衝無鼠輩平生椎轂盡  
清流急須整頓乾坤了鳴玉槐庭要黑頭

高門餘慶自綿綿唾手功名不作難况是胸中絕畦

知稼翁集 卷下 三  
町更於筆下富波瀾家傳元老謀猷壯人樂將軍禮  
數寬香火祝公千百壽姓名高並斗星寒

和謝單推宋卿普惠詩

逃空每喜足音聞之子相逢真可人知友無非大父  
行求君須向古人倫蠻烟傾蓋情如故蜀蠻題詩墨  
尚新文采風流百不俗更餘筆力挽千鈞

寄題方機宜稚川洪恕齋

恕齋且袖經綸手他日能容吏吐茵四壁琴書供宴  
坐一言佩服要終身襟懷但令有餘地刀筆從教不

若人想得清尊及閒暇賓僚相對面生春

官舍閒居

朝市競紛華山林甘寂寞要之其間各有趣飛鳥冲  
天魚縱壑我本麋鹿姿誤被簪紳縛男婚女嫁苦逼  
人薄宦天涯失身落似吏非吏兮似隱非隱謂強不  
強兮謂弱不弱五斗紅腐可以療饑一室琴書可以  
自樂負暄捫虱度清晝未覺嶺南官况惡

謝傳叅議彥濟雩惠笋用山谷韻

北方九月霜賓盤無生菜嶺南信地暖窮冬竹萌賣

君念庾郎貧爾粟供庖宰中有歲寒姿真時久不壞  
前身渭川侯千畝償宿債珠可配天花賤不數石芥  
早薤與晚菘奴僕望賓介文園酒渴餘想不厭姑噉  
預恐吹作竹明日東風噫急須驅兒童傾筐攜采采  
桂陽宰胡達信水孚同年見贈三首次韻  
場屋聲名識子初氣吞楊孔况其餘十年流落猶州  
縣千里往來祇簡書臥雨餐風從鞅掌昂霄聳壑正  
權輿割雞久屈屠牛手洗眼天涯看詔除  
誰能了了學癡兒身世從教事事違百不如人甘鷓

退竭來此地看鳶飛低徊共受微官縛早晚要須三  
徑歸賴有故人相慰薦霏霏玉屑坐生輝  
萬事人人咨伯始他年文采動詞場軒墀喜色回天  
眄鞍馬青春照地光社燕賓鴻催日月喬松翠竹飽  
風霜丈夫勲業莫嫌晚良驥由來老更驤

題綠陰堂

萬里炎荒一草亭微官挽我落南溟誰栽古木圍空  
翠為翦卑枝納遠青風雨半天秋縮瑟江湖滿地客  
伶俜日長吏散無公事欹枕看書門晝扃

和鄭邦達主簿元之五絕

斗粟折腰真鄙夫且圖一飽似侏儒淵明欲賦歸來引未免絃歌預計謨

望重東京憲與香自憐忝祖寸無長高天厚地容螻蟻乞與江湖作漫郎

長倩抱關真碌碌仲升吐策但平平頭顱四十已自揣空負林宗裁鑒明

風姿眇眇志堂堂詩句驚人易數長高士行看三府辟可容枳棘困仇香

邂逅天涯一破顏緇塵染素客途艱休將俗眼輕游子無數珠璣咳唾間

賀陸鹽允濟二首

商飈送喜滿華軒喬嶽鍾靈積慶門天上台星對南極人間佳節是中元一時閩越看前輩千載機雲見遠孫香火祝公如衛武他年勲業照乾坤

大手聊分八使車腰叢六印益紆徐園扉鞠草刑無濫萬竈熬波國有儲航棧蠻琛紛絡繹權衡選路不崎嶇蒼生久鬱爲霖望早晚徵書下玉除

知稼翁集 卷一  
題潮陽石塔寺

投檄真成出瘴鄉  
籃輿漸喜到僧坊  
長風解事吹江雨  
乞與行人五月涼

與方稚川

南來厭見跼飛鳶之子  
相逢意凜然未用天涯嘆淪  
落要知幕府盛才賢  
清譚霏屑論交地  
豐鼓喧江送別筵  
帆腹漸肥人漸遠  
離愁長在夕陽邊

與洪景伯

適

快筆三江倒宏材  
太室須平生閱人久  
所識似君無

嶺海非長策  
乾坤賴壯圖  
殷勤將壽筆  
邂逅卽亨衢  
老驥心猶在  
饑鷹寒易呼  
何時殿門外  
握手話江湖

題師吳堂

夫子賢堯舜  
老彭嘗竊比  
郊子及師襄  
下問曾不恥  
河汾一書生  
自謂聖復起  
西京投閣士  
敢與孟軻齒  
古人取名廉  
後人取名侈  
誰知今人中  
復見古君子  
方君帥南越  
千載少倫擬  
燕居榜師吳  
一謙具四美  
隱之經石門  
得名一杯水  
伯始萬事優  
可但清而已  
官曹服公德  
廉仁革貪鄙  
民俗陶公化  
淳厚勝姦宄

知稼翁集 卷一  
蠻獠畏公威折箠制千里老猾憚公明束手敢干紀  
三城有餘力一堂仍舊址裘帶自清閑賓僚多燕喜  
惟昔開元相勲業照青史胸蟠活國計試手曾向此  
我公廊廟具勞外亦久矣尺一趣歸裝高蹈廣平軌  
題七星巖  
天上何時落斗星化爲巨石羅翠屏洞拆三义盤空  
曲壁立萬仞穿青冥客尋舊路不知處龍去千載猶  
聞腥欲訪僊子問真訣巖扃寂寂水冷冷

赴南恩道間和楊體南

延禧三首

再歲大江濱了無功可程行行看絕塞錄錄更專城  
不作安巢鳥應慚出谷鶯賴同草玄手時抱一經橫  
身任東西南北居心安到處卽吾廬窮途俗眼休相  
薄沮洳馬知無大魚  
白鷗應恠舊盟寒斗粟低徊真強顏更度桑乾隔并  
土不堪回首舊家山

邵監本攜詩相訪用集中閒居韻爲謝

知君琢句用功深屹立長城不受侵紙上雲煙驚老  
眼筆端風雨起予心萬里初逢談袞袞一尊相對樹

陰陰斯文入手豈易得况復逃空喜足音

再用韻書懷

行行漸入瘴鄉深官事從人笑我侵越俎代庖真有  
媿逢場作戲本無心賓僚暇日一杯酒杖履西園十  
畝陰政爾無能落閒處且從猿鳥覓知音

西園二首

清樾纔十畝炎陬別一天華堂依恠石老木挿飛烟  
長夏絕無暑乘風幾欲僊心閒境自勝底處覓林泉  
意得壺觴外心清杖履間簿書休吏早花鳥向人閑

舊隱在何許倦遊殊未還天涯賴有此退食一開顏

和邵觀復本見贈

詩才千丈清且鬼筆力萬牛挽不回平生用心有根  
抵卮角指南得天才江西波瀾浩如海一派流落天  
南垓久謂升堂齒已齟可是持鼓門過雷詩能窮人  
豈其理人窮乃工於詩爾不妨俗眼自青白第恐獠  
音無正始俛首誰能兄孔方高談直欲妻法喜眼高  
未伏下孔楊渠宵碌碌數餘子我無寸長班俊髦狐  
裘之傍羞緼袍所得虛名真畫餅竭來窮海試鉛刀

書生習氣掃未盡畫諾閉門思和陶雖處囊中穎立  
見君欲逃名何可逃君家故侯青門東人物于今有  
祖風落拓一官姑吏隱敏捷千首追詩翁何者蹄涔  
留尺鯉未辦斗水活蛟龍丈夫功業不嫌晚政恐夫  
君甘養蒙

西園招陳彥招同飲

稻粱未飽且紛紛鴻鵠低徊雞鶩羣萬里歸心閩嶠  
月十年旅夢瘴溪雲隣諳好事頻賒酒家不全貧肯  
賣文未用天涯嘆離索一尊滿意說桑粉

再用韻

斗粟驅人墮世紛卯申鳧鷺動成羣桁楊閒臥吏休  
日尊俎清譚士集雲久矣蠻荒真下策信哉鄒魯號  
多文酒酣預約雞豚社會見婆婆故國粉

鑷白

昨夜庭梧滿意涼秋風不貸鬢邊霜等閒鑷白了時  
節書策縱橫日上廊

秋城晚望

斷續悲笳起麗譙冥冥晚色四山椒隔江人散虛分

知稼翁集 卷下  
米十里津喧蚤趁朝夕照含山心悄愴西風動地鬢  
飄蕭低頭自笑微官縛東望滄溟歸路遙

秋旱祈雨

萬頃膏腴欲泝龜禱祠曾不補毫釐朝廷無事政刑  
簡天地何心嶺海饑絕徼難逢霖雨手隱憂先到老  
農眉誰能鞭策臥龍起乞與滂沱一解頤

賀鄭漕三首

當年畫省與成均聯璧看君親弟彙清世幾人兼五  
福白頭相對備三尊朝班猶識尚書履時論同推通

德門早晚芝函趣歸騎要令勲業照乾坤

天子欲寬南顧憂繡衣曾是舊人求山川不改元風  
采父老能言昔政猷襦褲疲民應枕奠紀綱新度覺  
錢流生靈一種同天地雨露何偏十四州

東京望重兩儒先經術傳家幾百年派別九僊縣慶  
胄運逢千載毓真賢鼎槐未卽登三事社櫟何知托  
二天壽考祝公如衛武願賡淇澳入詩篇

體南先生戒途有日惠詩爲別三復黯然和韻  
奉送言不逮情

知稼翁集 卷下  
可但兒曹學未成鄙心蔓草要鋤耕勞君窮海坐賓  
館爲我文壇作主盟首宿闌干朝飯薄圖書跌蕩夜  
譚清便攜琴劍東歸得信有人間桑梓情  
搏沙聚散苦匆匆歲晚山寒吾道東萬木飄蕭催客  
老一官去住任天公情知今夕芳尊倒魂斷長亭返  
照紅却喜到家春正好蠻烟洗盡見華風

和章守元振三詠

華堂存繪事昭代得儀刑迹與莓苔古名爭蘭芷馨  
清風無遠近喬木未彫零今日斲泥手依然瘦鶴形

右包公堂

千里有餘刃一堂聊賞心庭虛延遠吹簷敞受繁陰  
休吏簾初下忘懷機自沉人間足塵土無路到清襟  
右清心堂

飛樓跨危堞雲霧曉披披形勝供臨眺公餘來燕宜  
江橫睥睨闊山入綺疏奇風月本無價君侯况有詩  
右披雲樓

次韻弟師白庚至日及弄璋之什二首

時序鄉心破烟波眼力摧城頭烏信喜海上鴈書來

一別壺山月三看庾嶺梅天涯椒桂酒淚墮伯仁杯  
未辦謀生學計然紛紛又落海西偏癡心政爾了官  
事坐嘯何能作散僊霜雪半頭明鏡裏江湖歸夢野  
鷗前入懷雙鯉詩材健醒眼三珠喜氣全處處看雲  
眠白日時時舉酒望青天想應留客煮湯餅弱柳犀  
錢細細穿

立春日有感

三見春歸人未歸天涯依舊賦春詩一官得失不相  
補萬事乘除只自知年去年來供屈指嶺南嶺北入

支頤柳眉桃臉競時節難遣東風染鬢絲

春思

紅入西園早青歸平野多日長花欲睡風軟幕微波  
萬戶茅柴酒一聲欸乃歌天涯春漫好無奈客愁何

對瓶花獨酌

紅紅白白兩銅瓶軟飽相看眼倍明鬻肉自能知鼎  
味底尋酒海與花城

恩平燈夕憶上都舊遊呈座客

千尺鰲山面紫宸豪華曾見夾城春至今魂夢釣天

奏投老宦遊窮海濱隨分尊壘奉佳客記時燈火照  
嚴闈年來大覺歡情減聊與風光作主人

方斛石菖蒲

勺水回環含淺清寸莖蒼翠冠崢嶸扁舟浮玉山前  
過想見江湖萬里情

石博山

誰琢翠嵐如許工晴巒洶湧欲穿空一塵不動心齋  
處寸縷初飛鼻孔通

章運幹才邵和綠陰堂用韻爲謝

工拙相懸幾驛亭敢將沮洳敵東溟百年事契心先  
許千里神交眼倍青嗜酒楊雄官拓落耽詩杜甫瘦  
伶俜何時握筆論今古經庫勞君一啓扃

自恩平還題嵩臺宋隆館二絕

四山如畫古端州州在西江欲盡頭漫道江山解留  
客老夫歸思甚東流

松菊壺山手自栽二年羈宦客嵩臺無端却被東風  
誤又作恩平一夢回

洪景盧邁賦素馨有遐陬不遇賞拔之嘆戲作

反之

不入東風桃李羣  
結根遠在瘴江濱  
眼看南國添春色  
天遣餘波及寶薰  
淡泊直疑梅失素  
清幽欲與蕙爭芬  
上林托足雖無地  
猶有香名萬里聞

和宋永兄圍棋青字韻因成五絕

翻劫解圍心有兵  
謀生政要眼雙青  
已收鴛陣烏巢幙  
未放鷹揚鷗滿汀  
塊然木石本無情  
底事紛紛如許爭  
天遣人間作仇敵  
只緣黑白太分明

一勝一負乃常事  
七縱七擒真妙機  
九械難窺墨翟守  
六奇終破白登圍

哲匠觀旁嘿若喑  
銜枚勇士用功深  
管中窺豹誰家子  
技癢時時不自禁

千里歸來兩鬢絲  
清風永日對枯棋  
紅塵萬事不到眼  
此樂勿容兒輩知

送陳景明誠之尚書赴召四首

物望唐姚宋才名漢董晁  
力陳治安策親際聖明朝  
謹議裨宸極高文燦斗杓  
鵬程九萬里一舉接扶搖

鼎軸今虛席憂勤軫我皇蒼生思起謝丹詔急徵黃  
風欲回三代恩難私一方願公攄遠業吾道倍輝光  
鴈塔相先後麟臺數往還至今清夜夢時共早朝班  
歲月棲遲裏雲泥指顧間天涯瞻馬首喜氣動衰顏  
薄宦跼鳶城歸來夢乍驚壯圖空老大朴學誤平生  
有客嘲楊子無人薦禰衡鹽車逢伯樂作意一長鳴  
次韻林梅卿尚書新塘之什

翬翼東西勢欲翔高懷卜築白雲鄉蝦鬚半捲山排  
闥屬玉雙飛水拍塘天上功名身未老年來丘壑意

何長萬間廣廈須公辦政恐徵書下建章

乙亥歲除漁梁村

年來似覺道途熟老去空更歲月頻爆竹一聲鄉夢  
破殘燈永夜客愁新雲容山意商量雪柳眼桃腮領  
畧春想得在家小兒女地爐相對說行人

僊霞道中

村村翁媪賀年華不道行人亦念家可是浮名能挽  
我杖藜元日度僊霞

次師白弟元日韻

知穆翁集 卷下  
且看時事愜心期莫爲流年作許悲足慰羈愁綠鴈  
序恐無奇策對龍墀梅粧已覺香全減柳線相將綠  
四垂臘雪漸消春又到人間底事不潛移

次李元泰字見贈韻

未遣枯桐逐竈煤君今收拾到微才東山謝傅爲時  
起前度劉郎何處來自喜餘年瞻日表恐無奇策上  
雲臺尊前不用悲流落懷抱相逢且好開

別陳景明二首

董晁大策無今古曾據龍頭拜未央天府帶頒腰覺

重露門茗賜齒餘香麻詞一掃千言就玉節三持萬  
里強自是中朝人第一更將威信愴要荒  
冤旒目送出延英鼓吹江喧引去程三夏日遲心自  
急百年恩重命還輕賈胡久矣傳詩句酋長依然識  
姓名丹鼎刀圭應有在願隨雞犬上蓬瀛

挽樂全宋丈二首

吾道初彫喪斯文竟老成一經貽子訓萬石擅家聲  
棠棣春陰重芝蘭晚節榮餘芳知未泯奕世有簪纓  
嘆息高人逝儀形繪事傳耆年餘八十遺行滿三千

朱紱沾新命蒼松鬱故阡春風笳吹咽桃李亦淒然  
挽朱師禹母二首

安室全貞操刑家藹令儀乘龍堆快壻幹蠱有馨兒  
未遂林烏報俄纏風樹悲汗青他日傳不媿栢舟詩  
孝養空懷橘嚴規想斷機影留生日面棺掩嫁時衣  
萱室言猶在蘭陔事已非九原行楚挽桃李慘春暉  
挽方有成教授

生平勁節朱絲直老去清規玉斗寒卜築空存新第  
宅典刑不見舊衣冠百年世事隨風燭二紀才名獨  
冷官謝砌餘芳知未泯森森兒姪長芝蘭

挽林惠州深父二首

吾道初彫喪名公竟典刑牧民沾漢璽詔子有常經  
阻奉金鑾對虛埋石槨銘登門人已往遺範儼丹青  
昭代輕辭祿高堂久擊鮮慶餘黃雀報夢契白雞年  
酌酒生芻外歸魂宿草邊傷生耆舊盡執紼涕潸然  
挽張直講聖行二首

末學知歸寓先生有典刑家貧甘半菽身後只羣經  
尊俎言猶在瓊瑰夢已靈林宗負全節無媿冢中銘

故老復誰在此邦嗟至今文章千古事忠孝一生心  
客散門庭寂塵留几杖深莆人頌遺愛南望淚橫襟

挽蔡公南別駕二首

撫政漸遐俗清風律懦夫人憐埋玉樹誰復奠生芻  
賦壽無三甲傳家有二雛經綸才不展身世一長吁  
往歲從新幕逢君入瘴鄉但知期白首誰意熟黃粱  
星屏塵埃合銘旌道路長幾經遺愛地清淚濕甘棠

挽歐陽夫人許氏二首

斷機貽子訓截髮具實盤異數行開邑他鄉忽蓋棺

薤歌春日晚萱樹北堂寒蕭瑟青門道萊衣淚不乾  
曹範梅峯下安輿晉水傍百年虧上壽五鼎富前喪  
鸞鑑塵初合龍龕木已蒼平生足陰德親受伯仁觴  
挽方仲及時簽判二首

才華早歲妙中州惠愛長存瘴嶺頭陳迹他年循吏  
傳遺文何日茂陵求平生業履一經在投老功名萬  
事休惟有歸然峴山石往來涕泗不勝流

年來羣盜滿南區百指間關返舊廬杖屨不辭還往  
數尊壘猶想笑譚餘音容忽忽成千古身世悠悠竟

六如脩短窮通一無恨可憐經濟盡丘墟

挽蔡子應樞郎中二首

德齒周元老風流漢二疏千鍾兒輩事三徑野人居  
獨行他年傳生涯幾卷書東山終不起天意竟何如  
襲慶名臣胄栖身世隱堂憂時多鯁論疾惡見剛腸  
髣髴商楹奠淒涼漢署香老成無復見雨泣路人傷

挽顧德將汝美別駕

襟懷淵海浩難量仕路恩威見弛張劇邑蒲鞭閑累  
月潢池血劍肅如霜朱門絕迹心常泰銀艾橫腰鬢

未蒼學不康時年半百可憐天道竟茫茫

挽吳君與公誠大夫

吳侯大雅姿妙齡飽經術場屋早蜚聲囊錐穎立出  
攜書走帝閣一第領髭摘夷途騁駿步霄漢刷健翮  
胷中萬餘卷未試二三策誰知廊廟具及任州縣責  
官小不自卑直道酬平昔愛民如愛子憂國如憂室  
愷悌疲俗蘇廉介貪夫律至今遺愛地籍籍數嘉績  
松菊動歸思塵埃辭吏役挂冠神武門高臥楊雄宅  
追念平生爲秋毫一無失桎梏謝軒冕膏肓嗜水石

知稼翁集 卷下  
十載州府間不見龐公迹萬事同甌破百年過箭疾  
嗚呼老成人忽忽就窀穸豐碑存衆口餘慶有佳息  
於公雖無憾豈不爲時惜作詩遣哀情詩成轉悽惻  
挽方宋賢于寶四絕方曾以獻書賜爵

少年挾策上皇都晚歲論功向石渠猶憶微才在天  
祿鉛丹曾爲校遺書

千年忠孝歸圖畫百卷風騷動冕旒一尉南州成底  
事可憐夜壑遽移舟  
管輅相無壬甲壽鄭玄夢告巳辰年收書恨未齊東

觀作記虛傳上九天

平生好尚流俗表無數交遊氣槩中未覺門前車轍  
少阿戎清賞有渾風

挽陳夫人卓氏二首

貴不改舊習老猶遵幼儀安貧偕隱者急義勝男兒  
餘潤河九里寧馨桂一枝秋毫有遺恨石窞剖封遲  
蘋藻潔羞遺訓在芝蘭奕葉慶源賒何人誅德須千  
字他日塚傍應萬家秋風摧謝忘憂草古木悲啼反  
哺鴉猶憶升堂初拜跪依然象服儼笄珈

挽林聞遠

曾向文闈屈壯圖羞將華髮傍戎車平生自致千金  
產投老相辜一卷書子克家追羯末何人會葬盡  
嚴徐青天白日佳城閉宰木蕭蕭總帳虛

挽趙若愚母

孟母鄰兮陶母賓祥麟威鳳各才名早持容德嬪天  
族誰信艱勤老我生雙鶴躡躑來弔客一牛巔肩得  
佳城人間毫髮有遺恨五桂纔看一桂榮

挽十一伯奉議諱卷四首

弓冶傳家學才名觀國賓譚經至白首投老漫青綸  
北去曾乘險南歸益自珍要知超悟處縹帙有離塵  
丘壑性所樂詩書老自娛譚惟聽兩部貧不種千奴  
歲月柯間蟻功名水上鳧平生五車讀留得付諸孤  
有子皆麟鳳承家賴一夔朝班通籍日綸誥錫封時  
堂上蘭羞罷人間風樹悲生榮死不朽猶恨未期頤  
往者更聲律公兮獨老成餘波及猶子作賦得虛名  
瘴海三年別靈巖一夢驚歸來訪遺跡心折涕縱橫

奏議

知稼翁集 卷一  
上殿劄子

臣聞洪範曰惟辟作福惟辟作威臣而有作福作威則害于而家凶于而國蓋慶賞刑威人主之大柄也柄下移則主道不尊天下之患有不可勝言者恭惟皇帝陛下體堯舜之聰明法禹湯之恭儉虛懷以招徠俊乂屈已以愛卹黎元比年以來干戈偃息農畝屢豐海內無事高拱以責成功而大臣任私上辜委寄爵賞以愛憎爲高下刑罰以喜怒爲重輕陛下務全體貌曲意優容羣臣畏禍莫敢一言天下之人但

知一相之重莫知君父之尊乃者天啓宸衷奮發剛健思與中外多士一新庶政甚盛舉也臣願陛下收還威柄躬勤萬機毋偏聽毋獨任凡爵祿廢置生殺與奪命政府大臣更相可否求合於道如或議論不同許各以已見次第敷奏然後自以聖意斷而行之天下幸甚取進止

第二劄子

國家之患莫大於以言爲諱以言爲諱則政事之闕失刑賞之過差大臣之專恣下民之疾苦皆壅遏而

不聞國之不危者幸也臣嘗觀自古貽此患者皆由其君愎諫遂非逞威喜佞故其下無敢言今日之事則不然 陛下寬仁大度容納忠謹臨御三十年未嘗罪一言者雖唐虞三代聖帝明王不過如是然天下敢言之氣摧沮殆盡良由用事之臣挾謗訕之律以鉗天下之口爾夫秉筆之士立言措意類不能逃疑似之迹今自朝廷百官下至草萊一介試集其所爲文於數篇中掎摭其語必可附於謗訕之律是此一律可以盡羅天下之士而寘之罪惟權臣所欲爲耳古者設官監謗立法止謗者皆非治世之事故舜立誹謗之木成周盛時士傳言庶人謗唐虞三代不畏人謗已蓋其中無歟惟恐天下不一指其失也臣愚伏望 陛下寬謗訕之禁下求言之詔使人曉然知前日以言語獲罪者皆非聖明之本心自可日聞嘉言感召和氣實萬世太平之基

邢孝揚覆謚議

爵位可以苟得刑辱可以幸免惟名終易謚美惡不可得而私公以名家爲國懿戚不沉酣於聲色少服

儒紳而與諸生角藝於成均不醜毒於宴安兩銜國  
命以副大臣宣威於絕域其奉身而退也棲心內典  
視富貴如儻來其易簣而終也貽訓後昆以死生爲  
晝夜公之出處可謂無媿謚之忠靖其誰曰不宜  
書

上陳尚書

物之可喜者人以其爲虛名而不知實用之所從出也  
鳳凰麒麟殆不如馬牛之可轡絡而用也然二物不  
出於草造僅存之世必人蓄滋殖治道晏粲而後見

馬故一麟鳳不知其幾百億馬牛也隋珠趙璧無補  
於饑寒然得是而貿易之與斗尺物較多寡何啻山  
淵之塵涓也小兒聚戲醉者搏黍齧者攫金性愈開  
而智愈明事愈異而喜愈大故農喜年豐商喜貨售  
綴文者喜得機雲之句求名者喜挂許郭之口孝者  
喜得親忠者喜得君氣槩者喜知己交游者喜得朋  
爲天下計者喜得非常之人嗚呼喜至於是極矣麟  
鳳不足以爲瑞珠璧不足以爲寶是喜也千百世而  
一逢歟舜之歌曰股肱喜哉孟子曰舜以不得禹臯

陶爲已憂不得爲憂則得之爲喜可知非特臣喜得君而君亦喜得臣也君臣交相喜政事以成社稷以固禮樂以興夷狄以服四方萬里喜氣不可涯淡農喜於田商喜於肆士喜於學官吏喜於朝禽獸魚鳥不知此喜而人爲之喜山川鬼神不見其喜而人想其喜某束髮讀書遐思喜極之事不意垂老乃親目之休哉休哉方今 朝廷清明邊境寧謐無可憂之事故亦有可喜之迹不幸台星掩耀黼座焦心驛騎南飛旌車北指閣下道德之重謨謀之富聲名之洋

溢想其登文陛覲天顏雲龍魚水不足狀其喜也我天子喜得其人天下爲我天子喜得其人而爲已喜得其欲故有公喜有私喜公私本無異合天下之私則公也某也公喜與人同而私喜與人異歲在甲子天子不以某爲愚不肖寘諸儒館某不自喜而喜與閣下接茵憑親馨咳獲識天下非常人爾後雲泥遼絕南北阻脩乃者閣下班秩西清分憂南顧高牙大纛輝映蓬華某不爲閣下喜而自喜踈遠未見棄於左右是二喜也疑私也然詢之儕類詢之道路詢之

田父野老婦人女子其喜有甚焉者則某之喜爲不私矣噫喜之極則愛之至愛之至則必有所獻焉今閣下之名第高出諸儒之右閣下之文章膾炙天下之口聰敏過人學問高古今其行也天下孰敢仰視然古之人有不以名第不以文章惟魯朴直而能了天下之大事書曰如有一介臣斷斷猗無他技其心休休焉其如有容人之有技若已有之人之彥聖其心好之不啻如自其口出是能容之以保我子孫黎民由是觀之自賢非難賢賢爲難哉某在南荒側聞

諸搢紳先生論今時人物曰古之所謂大臣者其心休休焉陳某之謂矣夫心不休休骨肉有不相容苟休休焉天下皆吾度內也休休之語千百年來無人當之東坡先生常以許霍光司馬溫公繼以許盧懷慎而諸搢紳先生復以許閣下以霍之無學盧之不敏其能有容猶見稱於後世况閣下之才而不自銜敏而不自矜其又在盧霍之上矣以閣下之名望而以此心行之日復一日若無有厭倦蒼生蠢蠢皆有望於閣下矣自始聞天書踴躍不自勝瞻企台光俯

伏道左足屢抃而口欲謠情不能已輒以毫楮抒中  
心之所欲伏惟少寓目焉冒犯威尊下情皇愧之至  
表

代謝御書表

聖經惇史炳若丹青寶翰宸章刻之金石出九重之  
副本爲列郡之珍藏蹠誦再三欣榮倍萬恭惟 皇  
帝陛下日新盛德天縱多能粹然洪深敏達之資輔  
以緝熙光明之學寰區底定烜赫帝王之極功廣內  
燕閒游息藝文之餘事心筆俱正古今所稀豈宋武

之足多畧文皇而不數兼八體以適勁述四書而發  
揮非惟爲儒者之榮予以見聖人之意臣幸生盛旦  
假守偏州識無魚魯之分躬被龍光之賜在天成象  
粲奎壁以相輝與世作程等乾坤而不朽

代賀冊皇后表

王假有家聿求於內助天作之合允屬於元妃涓穀  
旦以備儀卽長秋而正位事關宗社喜溢寰區臣某  
誠歡誠忭頓首頓首臣歷觀古先賢聖之君必有淑  
慎柔嘉之配虞興媯汭夏啓塗山有娥之肇商邦太

妣之隆周室故葛覃言后妃之本而關雎爲王化之  
基載在史編永貽壺則恭惟 皇帝陛下離明繼照  
乾健偕行將刑寡妻以御家邦思得淑女以配君子  
爰求懿德進統宸闈正六宮之表儀大一人之輔佐  
禮行太室侑成裸饗之共色養東朝助致寢興之問  
徽音克嗣陰教益脩推廣至仁男女得及時之願感  
召和氣陰陽無失序之愆臣職守遐方躬聞盛事情  
雖極於鰲抃身尚阻於鷓行已協周詩化天下以順  
婦願同堯祝使聖人之多男

啓

謝葉帥薦舉

從事南州已遠曠官之責剡章北闕重勤推轂之私  
譽實過情喜不逾媿竊惟上臣報國莫先以人志士  
殺身每爲知己惟授受盡由於公議則選掄多獲於  
真才仰無負於所期俯不愆其素守自時厥後茲風  
莫存在上者旣無意於作成在下者乃枉已而求售  
故寒陋不以銜鬻爲耻而王公常以簡貴自高每懷  
自獻之羞未有不求而獲競趨勢利闕如市道之相

知穆齋集 卷一 二十九  
求鉤致聲名用之公家而無補儻非凜高義操此至  
公則何以坐還千古醇厚之風頓格一時習俗之弊  
力推後進靡俟先容伏念某天與冥頑人誰比數徒  
守蓄畬之訓恐隳弓冶之傳豈意涼能偶塵高第名  
重而於實難副論高而與世多違俛仰一官侵尋七  
稔心期事業初謬意於古人力盡米鹽幾失身於俗  
吏尚幸私心所懷者梗槩平生自信者行藏不肯妄  
求不爲苟合不借名卿之勢援不資譚士之游揚敢  
圖不肖之名誤徹長者之聽匪由介紹自獲眷憐始

至門闌一瞻履幙尊俎接恩懃之宴齒牙蒙特達之  
知辱以褒辭轉之宸鑒斯前輩盛德之事公允蹈之  
在至愚極陋之姿望不及此茲蓋某官以忠致主以  
道覺民以文章作世程以人物爲己任知中才不常  
有必磨礪誘掖而使之成念小善不可遺故提攜汲  
引而與之進遂令謏薄亦預品題某敢不恪守初心  
誓堅晚節雖未能圖國士之報庶不終爲小人之歸

謝館職

稅鞅南州初離冗調離書東觀誤玷清流辭恐近名

受慚非據竊惟治道之隆替常繫人才之盛衰苟養於閒暇之時而須其成則至於緩急之際而收其用故皇朝大開儒館列承明著作之庭遴選時髦典圖籍藝文之事一無吏責每號英游非獨究簡編之斷殘抑將待器業之成就或以淹諳而持從橐或以詞藻而代王言或經術淵源而師表諸生或識度宏遠而參陪大政凡旋登於要路率多由於此途矧夫睿聖中興典章大備追述祖宗養賢之制式符堯舜稽古之心珍館一新掩天祿石渠之壯麗遺書盡

獲軼開元正觀之盛多自非博物洽聞鉉才偉議苦心識子雲之奇字強記誦安世之亾書則何以接蓬萊方丈之游紬金匱石室之祕如某者趨時獨拙賦分最奇鈍遲無倚馬之才涉獵之夢熊之對少壯努力初欲無媿於古人長大苦饑豈敢有意乎當世徒以家聲之墜地要須儒術以謀身不圖最爾之才乃中裒然之舉一行作吏百不如人自決科雖閱於八年而莅事纔更於二考汲汲于斗升之祿區區爲口腹之謀忽被優遷實踰素望人皆歆艷目曰登瀛之

榮已獨凌兢心懷臨谷之懼重念寒門之先世蓋嘗  
厠迹於英躔坐復青氈慚無歆向父子之學自量素  
業難居傅班伯仲之間何取孤蹤亦陪俊軌茲蓋伏  
遇某官股肱元聖羽翼斯文雖巍巍勲業之無前尚  
切切人物之爲意提攜晚進不遺下體之菲葑收拾  
寸長盡種盈門之桃李遂令頑陋亦預甄陶某敢不  
奮發遠圖溫尋舊習力死而後已之學讀生而未見  
之書誓竭微軀仰酬洪造雖大臣務得人而報國不  
容謝私然志士爲知己而殺身豈敢忘德

謝宮祠

騰憲府之章分甘求棄拜祠庭之命忽被優恩退自  
省循重增兢畏伏念某受才朴拙奮迹單微頃緣絺  
繪之文遂預楮紳之列粵從筮仕卽辱甄收捧檄南  
州久參幕畫讎書東觀濫厠英游皆鈞衡特達之知  
非左右游譚之助自憐無取必負所期果風波之橫  
生難調衆口雖鉛槧之無補敢有他腸所幸大賢之  
容人不以一眚而掩德縱排毀之端靡所不至而記  
憐之意終未少衰尚俾罪軀獲沾祠廩無官守無言

責日尋故國之交遊不耕穫不菑畲坐享全家之飽  
暖夫何幸會有此便安樞密相公道濟生靈量包宇  
宙立巍巍之勲業猶汲汲於人材待物以寬持心近  
厚已聞比屋之擊壤寧忍一夫之向隅憐其迂踈雖  
未能表見於當世察其寡特必不至立異於他門未  
忍棄相旋加湔濯其敢不退安閑散追訟愆尤間香  
火之餘陰理耕耒之舊業寓意栞書之內全身麋鹿  
之羣殘齒衰骸萬一未填於溝壑枯根敗枿庶幾或  
產於菌芝

答王守 辟章

三載鄰封舊親德宇一麾鄉部行被仁風未脩栞梓  
之恭先辱緘滕之問撫躬增媿與衆交欣某官全德  
難名巨材不器貌雖温而言則厲氣極大而志愈謙  
議論有君子長者之風望實聳楮紳先生之觀文章  
獨步繼鳳閣之三人簪紱相傳擅龍門於一世粵從  
壯齒自致要津登承明著作之庭紬金匱石室之祕  
猶欲盡觀其底蘊故須歷試以事功爰錫命於楓宸  
俾分憂於莆郡矧惟茲土昔號樂郊地雖瘠鹵而民

力耕菜俗雖顛蒙而家傳詩禮不勞游刃卽躋奠枕  
之安佇聽賜環入膺前席之問某久睽色笑尚辱記  
憐自分奇窮已甘邦有道之貧賤何期幸會獲事州  
主人之仁賢感與媿并意非言盡道途跋履歲律崢  
嶸願言旌旆之亟來式慰閭閻之久俟

謝授肇慶倅

恭承朝命俾佐郡條坎壈孤蹤荷鈞衡之平施瀾翻  
薦口賴根柢之先容感極涕零媿深汗溢伏念某乾  
坤長物湖海微生不能力穡以活妻孥妄意讀書而

干祿位蚤緣末枝獲際昌期本無籍甚之聲偶玷褒  
然之舉初從幙府依紅蓮淶水之游繼入蓬山紬金  
匱石室之祕親承咳唾屢接茵憑自憐素志之粗酬  
人謂青雲之可必名重而於實不副命乖而與世多  
違一辱泥塗五移歲籥托身餘潤如行霧露之中回  
首舊遊若在雲天之上不圖流落尚軫記憐寘之偏  
州寵以別乘非特起故將軍之廢且令任半刺史之  
權豈無夤緣致茲忝冒茲蓋伏遇樞密宮使侍讀真  
忠遇主斯道覺民高文儼作世程衆枝好若已有知

全瑜不易得必磨礪而使之成謂累敗未可捐故拂  
拭而與之進眷言及此感幸何窮某敢不祇畏簡書  
服勤官守鞭驅十駕庶幾免俗吏之歸矢竭孤生萬  
一圖國士之報

謝舉陞陟

承乏南州數載絕緘滕之問刻章北闕一言甚黼黻  
之榮譽實過情喜不逾媿竊以人才之用不用繫於  
公道之行不行其行也惟賢知賢付以耳目之所不  
及其用也以類求類舉其腹心之所嘗知惟其不務

文具徇流俗以市私恩然後能進真賢得實廉以稱  
上旨顧斯道寥寥久矣逮今日稍稍見之伏念某生  
而賦頑鈍之姿學不通古今之變名重而於實不副  
命乖而與世多違初雖妄意古人謂功名可唾手而  
取終乃甘心俗吏以歲月爲致身之資實自取之夫  
何言者然而私心所存者義命平生自許者行藏不  
敢枉尺而直尋獨耿耿者尚在以至跋前而疋後亦  
休休然其心自非高義過人冲襟絕俗又安肯借以  
齒牙之重達之旒纒之前茲蓋伏遇某官體上臣之

事君思天下之善士下交不瀆謙謙得君子之終久  
要不忘戀戀有故人之意而某舊學荒落壯心蹉跎  
必無騫騰之奇以副特達之遇粗知守法庶可酬恩

肇慶韓黠交代

叨奉上恩攝丞郡政人品最下初無籍甚之聲稱天  
幸良多獲繼賢者之軌躅趨風有日進記通名某官  
地望高華天資警敏趣操自拔於流俗學問不媿於  
古人受才如璞玉渾金莫名其器遇事有盤根錯節  
益見其能宜闊步於要津豈淹翔於外服蓋欲備嘗

於險阻以爲大用之權輿某不能力穡以活妻孥妄  
意讀書以立門戶俯仰寸祿蹉跎壯心顧吏才素號  
空踈而官守適相先後涉筆占位敢自謂半刺史之  
權賸馥殘膏庶幾聞舊令尹之政

肇慶劉守仿

誤被宸恩攝丞郡政空踈無取深慙小子之斐然幸  
會何多獲事大夫之賢者知聯事合治之無補喜承  
顏接辭之有期某官清白傳家文章華國儒雅飾吏  
愷悌宜民以從容適時之才而周旋當世之務使馬

知穆翁集 卷下  
如羊使金如粟難移張奐之心賣刀買犢賣劍買牛  
一新渤海之俗久以賢勞而分憂千里佇觀課最而  
入爲三公某天賦冥頑人誰比數雖素無一日之雅  
行將有二天之依官類魏舒固嘗襍被才非仲舉敢  
覬題輿東壁分輝儻獲在照臨之下南薰假翰庶幾  
無痕曠之虞

又

三年散地叨奉真祠一旦誤恩俾丞郡政知聯事合  
治之無補幸承顏接辭之有期某官世濟忠嘉才全  
經緯望實聳樞紳先生之觀議論有君子長者之風  
當羽儀於中朝乃蕃宣於外屏蓋九重不忽於幽遠  
故一麾借重於老成共仰承流宣勞來還定安集之  
意佇觀入覲奏康樂和親安平之書某奮迹單微受  
才朴拙學不知變每與世而背馳仕專爲貧初無心  
於擇地何知蹇步獲並英遊分我餘光行將出照臨  
之下因人成事庶幾無痕曠之虞春律向中黃堂多  
暇願益琤於調護以上體於眷懷

上鄧鹽文饒

恭承朝命叨贊郡條流落孤蹤益遠長安之日黃緣  
大庇幸依刺史之天揣分難堪捫胃增愧伏念某清  
時棄物僻壤腐儒生而賦頑鈍之姿學不知古今之  
變偶緣章句誤玷簪紳初嘗妄意古人謂功名可唾  
手而取終乃甘心俗吏仰斗升爲餬口之資雖跋前  
疋後之可憐亦流行坎止而無媿竊惟高要密邇雄  
都在昔人號跼鳶之鄉卑薄殊甚於今日乃潛龍之  
地授受不虛何取非才輒參別乘某官剛直養氣仁  
厚存心立朝之大節可觀出使之威聲彌聳通達國

體期天下之澄清旌別人才蘊胸中之涇渭凡在照  
臨之下舉懷榮幸之私某猥以庸虛夙蒙知獎念昔  
居於輦轂嘗屢接於茵馮夢寐舊遊若倚層霄而躡  
步涵濡餘潤常疑清露之霑軀期夙夜於公家庇初  
終之德宇

賀林諫議梅卿

大禹

顯承詔綽擢長諫垣知朝廷公議所歸作士夫敢言  
之氣有識相慶不謀同辭竊以禁從之班於今最貴  
諫爭之任自古爲難惟德大則一日九遷而人無異

言苟望重則垂紳搢笏而上無違德是以千秋拜相  
由寤意之一言魏鄭立朝自致主於無過蓋任賢享  
天下之福惟大人格君心之非自匪真才曷膺妙選  
恭惟某官門下道全經緯學究淵源氣極大而志愈  
謙貌雖溫而言則厲奮由直道一人心知其精忠動  
合至公四海想聞其風采衆咸謂當今之世大有爲  
捨公其誰果若人言立登要路必將展盡底蘊維持  
紀綱力行平昔之言大慰邇遐之望獻其否以成其  
可綽有古名臣之風以斯道而覺斯民蔚然真宰相

之器願已久矣行將見之不佞其猥以庸虛舊蒙知  
獎初聞成命喜觀賢路之亨自幸微軀將有化鈞之  
托

回四會宰陳亮功

襍被造官姑借一同之重交印眎事行聞三異之成  
黨友增歡閭閻相慶恭惟某官挺生名閥綿歷仕途  
得處已之重周有宜民之愷悌尚懷墨綬來邑嵩臺  
毋嗟期會之徒勞政仰寬隆之誕布雖魯城絃誦尚  
有賴於言游而建武旌車恐先求於卓茂佇膺眷渥

俯厭輿情某夙忝懿親偶同王事馳一介之未暇辱  
雙緘之見貽感媿于中宣寫難盡

謝惠生日詩

尋佳篇之下逮慶賤子之始生誦熊羆占夢之詩前  
無作者興父母劬勞之念寧不慨然感與媿并意非  
言盡

回譚解元 惟寅

偶備數董棘闈之政督有司程藻思之文雖袖手噤  
頤無所可否而駢珠儷玉亦預榮觀寵餉琬函深

牢佩其人儒林杞梓學海鯤鵬摘黃絹之妙詞還青  
氈之舊物百發百中已收穿葉之功一飛一鳴竚看  
冲天之舉

迎黃憲 應南

伏審顯膺宸渥荐擁使華增重繡衣之榮坐復青氈  
之舊帡幪所逮鼓舞攸同恭惟某官望重搢紳才全  
經緯出處有古人之節文章爲後學之宗鼓篋膠庠  
作一時之領袖裁冠豸府正萬世之紀綱衆欣賢路  
之方亨公乃急流而勇退出持憲節徧歷遐方按三

知稼翁集 卷一  
千屬之祥刑極四十州之弊俗鞠黃沙於茂草豈惟  
三木之生塵收赤子於潢池殆見五兵之不佩未容  
暖席行見賜環某猥以庸虛夙蒙知獎昔効官於輦  
轂獲接迹於茵憑回首舊遊彷彿頽霞之表托身餘  
潤依稀碧霧之中

賀方帥務德移福州

光奉璽書就移玉節從民望也一新閩嶠之風我公  
歸兮漸近長安之日庇庥所逮鼓舞攸同恭惟某官  
世濟忠嘉才全經緯清規絕俗而得渾厚端方之體

德量過人而有沉深機警之謀閱禮敦詩易蠻獠四  
十州之俗輕裘緩帶得貔貅百萬衆之心懋著聲猷  
彌隆眷注繫三山之奧壤控百粵之上游簪組蟬聯  
舟車輻輳當八郡兵民之寄皆一時卿相之才勞申  
伯式是南邦已聞報政命君陳尹此東夏行見賜環  
某夙荷眷憐獨高夷等曾忝部封之屬吏又爲里落  
之編氓託蔭居多馳辭敢後簡書可畏禮未展於鳧  
趨竿牘代言情有同於燕賀瞻依之悵敷敘奚殫

權南恩謝諸司

貳政星巖深慙尸素攝官龜嶺誤辱眷知問途而鄉  
井益遙拂印而面顏有覲某學不知道仕專爲貧人  
每憐其寔後跋前已自安於流行坎止老驥伏櫪空  
壯志之猶存窮猿投林欲擇木而何暇惟恩平之小  
壘在南海之一隅吏姦黠而民困侵牟地荒遠而人  
多鄙薄風俗彫甚儲峙蕭然顧於此時濫假長民之  
寄恐不終日卽貽知己之羞更賴餘輝以圖後効茲  
蓋伏遇某官最深憂國務在得人方攬轡慨然澄清  
其推轂無非寒畯遂令頑鈍亦預品題某敢不恪守

官箴勤卹民隱効昔人一日之居必葺庶窮海積年  
之弊可除越尊俎而代庖人雖出位背君子之訓賣  
刀劍而買牛犢儻用心有循吏之風

賀陳帥李任

楠

疏恩北闕擁節南州輟九重侍從之清班付一路兵  
民之重寄旃幪所逮鼓舞斯同某官學究淵源氣全  
剛大出處有古人之節文章爲後進之宗發策決科  
早登名於異等昂霄聳壑旋接武於清途芸閣磨鉛  
螭頭簪筆典朕三禮而居秩宗之任召魯諸生而修

知稼翁集 卷一  
綿叢之儀衆欣賢路之方亨公乃急流而勇退智恬  
交養譽處彌休內外多所踐更名實加於上下大江  
千里得李勣賢於長城細札十行命申伯式是南土  
眷茲嶺表控彼蠻陬封圻雖遠於中州事權實甲於  
他郡出盧奐爲太守豈曰左遷召宋璟以尚書行將  
大用某攝承支郡忝辱年家敢圖幸會之來乃在庇  
庥之下效官有守不獲負弩矢以前驅趨慶無階輒  
敢馳緘函而寓意

迎鄭漕才仲兩

顯被宸恩奉十行之漢札肅將使指馳六轡於周原  
邸報初傳輿情交慶某官德方以大器博而閔紉蕙  
握蘭早見知於當宁登車攬轡久宣力於外臺出處  
多所踐更名實加於上下眷惟東廣控彼南荒封圻  
雖遠於中州委注不侔於他路于以銓衡於百吏何  
止饋餉於六師帝曰疇咨人惟求舊坐獲青氈之故  
物復畀綉衣之重權耆舊十年謳吟猶在江山千里  
風采依然佇奏課於木牛卽召還於金馬某接居鄰  
壤厠迹提封敢言半面之知幸托二天之庇

聯同前

回黃高州 德初

誤膺臺檄暫守郡符越尊俎而代庖深慚出位如兼  
葭之倚玉幸托餘輝方喜同千里之休乃先辱一介  
之使某官望隆士表才號吏師藹然奕世之忠嘉優  
有致君之事業蜚英騰茂才名獨擅者四十年宣化  
承流能事最推於二千石屬睿主久懷於幽遠故遐  
方借重於老成與其歛大惠而施一州孰若告嘉猷  
而澤四海久聞報政卽見追鋒某里閑晚生乾坤長  
物昔恨馬牛之不及今欣雞犬之相聞儻不廢於親

仁善鄰庶獲沾於殘膏賸馥爵縻吏鞅雖末聆咳唾  
於几席之間輿頌口碑已屢采歌謠於阡陌之上

賀陸漳州 渙

光膺宸命榮領郡符疏滌利源久乘輶於南國統持  
方面遽握節於東州慶君子之逢時見烝民之蒙福  
竊以太平作郡莫急於撫綏良吏存心惟先於寬恕  
茲朝廷所以重老成之士而黔黎因之多休息之期  
矧閩嶠之遐藩眷臨漳之奧壤人情簡古土物豐穰  
允宜蘊藉之儒以布中和之治恭惟某官器能通博

學問淵微視十四州之職而已處於雍容諒二千石  
之尊而不勞於聲色佇期報政行屬登台某夙忝下  
僚欣聞盛事媿莫陪於賀客徒企仰於恩闕

回梁文學 作心

親承聖問高擢儒科青衿知稽古之榮梓里見破荒  
之事士風增重公論攸歸新恩先輩懿德弼中高文  
行遠粹矣崑山之片玉燦然滄海之遺珠負百發百  
中之才振一飛一鳴之舉刈其萋楚雖無南宮新進  
之功收之桑榆乃得大器晚成之効某偶承官乏獲

際榮歸過煩左顧之勤申貺長牋之重惟知嚴佩曷  
究名言

賀林高州交印

伏審洗篆臨民褰帷問俗最然小壘寔甚邇於鄰封  
首被餘波敢不馳於尺牘某官器函方大德秉粹明  
優爲華國之文章綽有致君之事業橋門萬計早擅  
雋聲江海一麾再煩妙手蓋清朝德澤欲暨蠻陬故  
宿學師儒姑借君重與其斂大惠以幸千里孰若盡  
嘉謀而告九重恐孔席之未温卽周行而誕寘某乾

坤長物桑梓晚生已閱瓜時尚茲匏繫旌旗夾道且  
幸接名理於函丈之間雞犬相聞行當問教條於封  
圻之上

### 罷任謝黃憲

一官托落毫釐無補於公家三歲終更頂踵盡由於  
恩地登門莫及解組知歸伏念某本無寸長偶竊薄  
宦磨鉛東觀初不習爲吏之方捧檄偏州乃出於爲  
貧之計崎嶇兩郡首尾四年久閱瓜期幸逃官謗顧  
微軀之罪戾疵疾猶自知之非當路之終始矜憐難  
乎免矣茲蓋伏遇某官寬慈接下忠恕待人迄全流  
落之蹤俾遂飛沉之適鄉關在望預想故人平生之  
歡溝壑未捐尚冀異時驅策之下

### 謝叅政

持版佐州久負空餐之媿及瓜還里偶逃曠職之誅  
生成皆自於化甄俯仰益慙於恩地伏念某稟生固  
陋逢世休明簸揚而得糠前猥塵科甲跋躄而蒙寸  
進頗冒鈞除頃從幕府之歸擢預書林之選橫恩旣  
過公議何逃猶曲荷於保全俾退安於閒散一違熒

先穆翁集 卷一 四六  
座十換年圭灑掃真祠已負取三百困之訥翱翔半  
刺尚令分二千石之權州無瘴嶺之氛邨有固陵之  
舊幸哉藏拙甚矣叨榮屬當交泰之朝方極包荒之  
量德明光於上下公旣祇歡聲教暨於朔南民亦易  
治雖勤夙夜莫効涓埃銜恩浹於肌膚揣已輕於毛  
髮某官仁漸夷夏勲塞天淵開廣廈之萬間并容多  
士轉鴻鈞之一氣鼓舞羣生眷此孤蹤最爲舊物顧  
窮途其向晚捨公府以馬歸疲馬戀軒惟不忘於舊  
德枯魚在轍實深望於餘波

